

四庫全書

集部

欽定四庫全書

文忠集卷七十四

平園續稿三十四

宋周必大撰

墓誌銘四

曾廸功郎

彥圭

墓誌銘

嘉泰二年

曾氏世為吉州吉水縣人至和中析報恩鎮置永豐縣
令蓋永豐人也君諱彥圭字君玉幼端雅力學靖康後
所在擾攘家藏書悉燬於盜常產亦廢父龍南尉鬱鬱

不樂母黃氏又苦羸疾君奉養幹蠱兩極其至母遺言以幼子弇屬君即為延名儒教之而君次子渙尤早成薦名禮部淳熙甲辰遇慶壽恩封君迪功郎致仕紹熙庚戌渙遂擢第嘗再遇慶典君皆抑使勿請治家有法御下以禮待族屬孤幼曲盡恩意踰七十強健如五十性喜延客至必盡歡邑官里人咸知尊敬鄉鄰爭鬪或滯訟得君言脫然而悟人有逋負間為代償盖其心主於慈惠故留意秦越人倉公及張仲景之書有以疾診

竭誠貧則加贍給馬踵門數十輩未嘗憚煩每嘆曰陰
德猶耳鳴自聞而已一日徵恙應酬如常詰朝忽命具
湯沐乙夜湛然而逝嘉泰元年正月己卯也享年七十
八娶王氏封孺人四男長澧次渙從政郎隆興府豐城
縣令文而能官次清次瀚女適進士熊汝能孫男十二
人公植公敏公振公遜公浚公衡公壽公應公遇公孚
公從公愆女八人適進士張元良熊唯張萬選餘在室
曾孫二男一女是歲十月丙午葬隆雲鄉龍來之原渙

以大府王卿持狀來請銘予每嘆近世士大夫家譜罕傳上焉不能舉其族下或降在皂隸不知懼獨魯氏此書粲然可考自唐末遠祖慶生偉偉生輝三世為廉平吏階勲名德俱高四世崇範事南唐嗣主於東宮其沒也蔭子延脩為步驛吏隨後主入朝改左班殿直於君為八世祖諸子先以儒學奮身顓登第李氏時本朝淳化咸平中曰顓曰顏曰碩相繼登科一傳為純為有鄰者皆舉進士再傳朝陽慶歷二年登科後四年弟匪繼

之百荷以五經薦名即君高祖也又一世正矩太學內
舍生鉞以上高縣主簿舉八行其季諱貺君曾祖也曰
度正和二年中第終奉議郎民瞻宣和三年中第終南
昌尉而諱安民者君祖也至和六年度之子彥明復登
第終從政郎廣東轉運司幹辦公事而諱彭年尉龍南
者是生四子君其季也于是掇大畧書之且為銘曰
譜牒之湮志忘勸懲瞻言魯氏世美相承君有隱德又
將勃興銘昭予昧式穀雲仍

朝奉郎袁州孫使君

逢辰

墓誌銘

嘉泰二年

吉統八邑龍泉號山水縣故多名人孫氏又其名家也
初諱文者仁厚有家法諸子皆力學曰元量擢大觀三
年進士第終賀州教授曰叔通從贛上李朴先之學徽
宗朝貢京師投匭論星變請開黨禁忤蔡京斥歸郡庠
自訟齋政和二年登第終清海軍節度推官叔遇倜儻
喜周急博通羣書不樂王氏學日與黃元銘徐德饒歌
詩唱酬後贈承務郎生宜再舉禮部早世累贈奉直大

夫娶羅氏封令人三子鼎立見謂三傑長吏部侍郎逢
吉號賢侍從次逢年筆力高古仕止南安軍上猶令史
君其季也諱逢辰字會之豐裕秀發人推遠器年十八
鄉舉首薦登乾道二年進士第以左迪功郎尉潭之衡
山邑宰趙汝誼連帥介皆通明嚴重遇盤錯輒屬君辛
卯歲儉湘陰為最帥陳彌作檄君行縣事戢姦賑荒闕
逋四歸特循兩資君丐貤恩封母太孺人別用舉主升
從事郎移贛州贛縣丞歷事三守監司六七人皆咨其

清稱其文伏其能劇邑幕屬闕爭委攝承議事制刑率歸闕

恕淳熙二年茶寇轉剽江西君請精擇土軍叅以

贛卒柳桂弓手別募敢死軍分委偏將或扼賊要衝或馳逐山谷間而命荆鄂之師養威持重乘賊憊於後帥不能用已而上命卒棄疾綉衣持斧乘傳來竟如君策師旅方興屬君調軍食君持金帛即所至易米於民省饋運十七八漕李燾錢佃以名聞詔任滿赴堂審察守施元之向授京狀君遜同僚之垂成者元之大喜上章

論薦又詔中書籍記終更改宣教郎審察特添差簽書
秀州軍事判官廳公事乞便親改鎮南軍死囚詳覆君
察可憫請奏讞一月中全活者三街吏告行有死人馳
視之餘息尚存療治稍蘇始知夜行吏奪其幣而害之
捕治伏辜其明察類此兵銓役禁軍興力役以媚守帥
許援親兵及水軍例增食錢吏摘牒尾如熟事請君書
押君執不可守怒曰此例也君曰親兵乃岳飛舊人有
糧無衣故乘除如此水軍則以隆祐太后避地於茲驟

聞敵至賴其力得上贛特許優給自是闕者勿補今僅存二十輩耳若無故創支禁卒歲十萬緡力固不足且非州家所可擅也守不能奪兵官嗾諸卒訴庭下君徐以理曉之拜謝而去吉贛舊各置船塢須油麻坊木民病科折君言於漕裁減萬計鄉邦解試士踰萬人考官止七員君請用福州例增二人苟利公家率勇為之七年江西旱九江尤甚君將代諸司請留賑濟君籍下戶及商販技術與無以自營者為三等計戶口給歷十戶

一甲甲給一牌五日輪一户齎錢牌場市粟周而復始
置安養院處老弱孤獨給以錢米負郭選邑佐鄉村擇土
官分董之事有未安不憚立改文書紛至手披口占畧
無凝滯凡用米八百餘石它郡取撥亦稱是又勸上户
平價以補不及起正月盡六月訖無流殍監司乞優賞
君固辭是時予遷吏部尚書兼翰林學士承旨郎奏君
自代磨勘轉奏議郎九年五月入提轄行在權貨務都
茶場將試用也賞轉承議郎以太令人年高求知澧州

命下丁內艱叅知政事蕭正肅公燧嘗薦君守邊中書
舍人崔興詩復以職事官薦服除選知袁州未上轉朝
奉郎十五年正月二十三日以疾卒於家享年四十七
明年十二月乙酉葬本縣南鄉瓜陂之原妻安人李氏
同邑椿之女前卒子男三人鑑早亡鑰今為從事郎靖
州軍事判官與其季鉉俱能其家女適進士康晉之孫
男四人君資性高朗博觀載籍善為文辭待交游誠信輕
財重義遇歲歉出粟為之倡嘗慕范文正公置義莊贍

宗族買田北鄉以歲入給貧者伏臘吉凶費市藥療病
買棺送死衣寒食饑傍及鄉黨君既沒二子繼其志且
存規約君幼師李栖梧司法李沒子瞽女未有歸極力
濟之縣東三里蜺子陂久廢君捐金穀募民復脩導水
數百丈溉田不貲今號孫公陂平居處事有條理喜論
大利害援古證今如指諸掌律身廉謹在官兼職雖衆
却其添給士大夫多以功業期君君頗自許也設使天
假之年推愛人利物之心豈止復一陂仁一鄉而已乎

生著述有養晦類稿三十卷予久與君兄弟游鑰以文
林郎全州清湘令李闕狀來請銘為之銘曰

孫氏三龍李惟邦君才氣之高謂凌青雲幕府王官以
明濟勤仁蘓野苧惠周鄉枌羣賢交薦竹符僅分未了
千礪遠瞻丘墳宜壽而否胡戾前聞流慶來裔尚考斯
文

承直郎知東安縣趙君

彥偁

墓誌銘

嘉泰二年

魏悼王七世孫曰彥俊後名彥偁字才卿曾祖叔曉左

侍禁祖挺之訓武郎父公顓秉義郎仕吉遂家焉君清
介有守刻意經史未嘗詭隨苟合惟擇賢者與之遊詩
文日進紹興二十九年預漕薦三十二年覃恩君以迪
功郎主永州和陽簿同僚服其廉勤外艱去官奉母撫
諸弟日益讀書服闋調南豐尉乾道七年鎖廳奏名特
補左儒林郎廬陵宗慕之自是多中第者注臨江軍判
官屬邑新淦號難治常賦大虧滯訟滿庭守檄君攝事
以辦治聞循承直郎安慶軍節度掌書記守貳替移樂

常行州事政號明敏繼攝倅監大比試勉勵考官精覈
文卷明年過省者二人舒人美之前執政李公彥穎薦
以京職秩滿得提點鑄錢司檢踏官分局曲江以母憂
去免喪知東安縣零陵郡連旱公私赤立君禁戢吏姦
勸課農桑民譽翕然雨暘或愆祈禱立應邑境大熟先
是二稅盡歸州家用度匱乏君請從民便諸司從之縣
始有餘裕而君積勤致疾嘉泰元年八月己丑沐浴而
逝享年六十五家素清貧至貸錢買棺而歸二年九月

庚申葬廬陵縣儒林鄉龍陂之原先娶朝請大夫知道
州歐陽庠女既沒予堂兄朝請郎知袁州必達喜君嗜
學潔已以女歸之復早世又娶朝請大夫知連州蕭祖
祐之孫一子闕夫業進士三女適鄭份胡允迪孫時簡
時闕銘曰

自重者好脩安分者寡求彼寒峻猶克艱此公族乃兼
優倚才猷之表表恨時命之悠悠尚垂裕於後人永固
安於斯丘

安德郎主管崇道觀趙君

伯球

墓誌銘

嘉泰二年十月

嘉泰壬戌八月己丑藝祖皇帝七世孫武德郎伯球卒
卜以十一月庚申葬吉水縣中鵠鄉洞巖之原其室孺
人王氏前三十年歲在辛卯亦以八月辛亥卒權窆凌
家塘至是就葬武德墓南二十步孝子容州北流縣令
師撫南雄州司法叅軍師復南安軍大庾縣尉司掄號
泣請銘鄉人皆言武德善人長者子又與其二弟及其
外舅知肇慶府王衣子裳有契義不可辭君初名伯松

改今名字堅老贈少師馮翊侯世覃之曾孫贈永興軍節

度使東牟侯令賓之孫武翼大夫真州兵馬鈐轄子某

光宗廟諱

之子君四歲喪母毛氏六歲喪父紹興十二年門

蔭承節郎歷監衢州江山縣及富沙稅兩監潭州南嶽

廟乾道元年添監吉州苗米倉不釐務遂家焉既滿注

衡祠者六升朝改主管台州崇道觀者五磨勘及泛恩十

二轉而終君早罹憂患力學自樹立族叔高州遂溪

令子淇卒官君

闕

入瘴鄉奉五喪携孤幼以歸既仕竭

俸入擇師友教子弟長弟承直郎監兩浙轉運司造船
場伯瞻登戊戌進士科次廸功郎衡州司法叅軍伯楷
累上南宮三子並拔漕解章恩入官君天性儉約而樂
周急凡官族留落登民流徙及里閭疫癘人莫敢視君
每傾身濟之棲志雲水日延道民始終無倦其疾也師
撫自廣西星馳歸省病棘勉以孝友忠勤神色不亂沐
浴而逝享年六十七五子二早世四女適州學諭戴作
肅鄉貢進士劉年職次許劉徹一尚幼孫男未名二女

長適進士胡天麟次幼銘曰

志趣翫然家廷蕭然其處超然其逝飄然三子茫然餘
慶昭然墓櫨翹然過者忉然

歐陽伯威墓誌銘

嘉泰二年

嘉泰壬戌六月甲午廬陵歐陽伯威以疾不起其妻金
氏先葬城西能仁寺之西原山卜十二月乙酉即墓左
穿穴祔焉其友曹生交顯致伯威遺言以狀請銘予曰
生文美矣抑伯威吾能言之是負氣節有文章安分義

人也少與予同應舉伯威學廣才膽銳欲拔蚤弧而先
登已乃連戰不利士悼其屈家故官族愛母弟鐸恣其
費弗問遂窘伏臘聚關為仰事俯育計名卿大家爭延
訓子弟時官聞名皆來禮請其間賢否不同徇物必招
謗絕物或賁怨君皎皎其躬溫溫其容束脩外毫髮無
預物莫能浼人自親愛善論古今間以談諧尤工詩騷
涵泳鍛鍊啟前人闕鍵大篇短章隨意所之待制楊公
萬里序其脞詞曰鳥啼花落欣然會心處大白嚙伯威

詩欲馭風騎氣也至於抄警句誦之瀘溪王敷文庭珪
西溪劉孝廉承弼楊愿皆教官詩豪或以孟襄陽賈長
江比君他文率過人嘗著遇諫詞蜂螫蜘蛛賦胡忠簡
公極口稱獎一時名公推重如此胷次洞達遇人無町
畦逢酒輒飲當酣適時咳唾成珠璣歌呼薄霄漢不知
世之隘身之窮也予在政府數欲官之謝曰欲吾數口
無饑足矣焉事虛名逮予來歸而君視瞻茫洋不復教
學簞瓢怡然時時相過道舊以目青踈翹生親王友步

趨亦蹢躅獨豪氣如初予每憐之聞其訃疾數遣醫往
視已殆猶策杖訪曹主索酒賦詩云舊遊應好在誰念
此生浮蓋絕筆也平生篇什脞詞外分五編號漫成遣
興暮景自娛松筠別有襟著五卷見聞錄之伯威諱鉄
自號寓菴世為郡人高祖登以其子澶州通判粲遇恩
贈奉議郎曾祖來用舉守本州助教祖元發雖不仕
而弟將作監承珣靖康間以忠義著父宣教郎克字彥
美擢紹興壬戌進士第戊辰歲卒官廣西伯威侍母何

氏携諸幼護廬千里返葬永和鎮畢二弟三妹嫁娶人
以為難三子玕玕砮業儒二女早世孫三人簡輅篇予
與伯威及葛德源潔皆生於丙午比歲宴集唱酬歡甚
有繪為三老圖者前哭德源銘其藏今復銘君何悲如
之銘曰

嗟乎伯威少慕太白才不羈而行不虧中遊飯顆午不
炊而樂不饑晚隣文昌醫不治

平聲

而筆不衰賢哉若人

衆所推今其已矣誰弗思後有式墓

闕

徒悲尚酹以酒

吊以詩

郴州張使君

銅

墓誌銘

嘉泰三年

新郴州張使君卒兵部章侍郎穎既大書伐閱其子復
請銘閱之幽予常愛柳宗元記先友六十人叙所長有
史法而以袁高為首謂能使吾所居官大其該涉廣矣
今君初以迪功郎主荆門軍長林簿垂赴丁母憂服除
歷靜江府司戶廣州右司理叅軍常德府教授堂差知
靜州永平縣郊恩賜緋魚通判福州兼西外宗正丞晚

擢二千石期以循良自見乃弗及上識者有用未盡材
之歎是宜特書始君仕桂林帥范文穆公文章政事高
一世待以上客靈川有殺人獄歲久尸壞不承君指顙
髻下重傷一問伏辜闔府神之五羊王氏葉氏皆富盛
王氏婢死帥疑主人害之葉氏僕暮夜隨人入城閭者
求金不獲自毀關鑰誣之君力辨其非帥初怒終察提
刑王賅按獄多所詰問吏戰栗不能對君出幕後悉為
條陳由是諸司舉其材陞從政郎常德校官久不振君

教導課試有方生員日集廩粟不繼助以主租又請閒
田於府儲歲入葺棟宇新釋奠儀正侑坐之位城北有
泰渠唐刺史胡處立所開溉田千餘頃廢於崇寧間士
子皆曰此邦秀水在是不可堙也君白常平倉使者薛
伯宣由梁山下導水二百里附城為坡堰隨旱澇節其
啟閉而命武陵尉闕嵩董正役既成自為之記士民胥
悅臺府交薦改宣教郎淳熙十五年也永平雜蠻徭日
夜相讐殺漢法不能治君不鄙夷其民威愛兼用即江

湍險創浮梁以濟俗病屠牛祭鬼君教以醫藥將代邑人及蠻酋楊正道相率借留帥章森監司張孝曾郡守姚矩陸耘老俱以循吏薦時宰葛文定公將寘之朝君求福倅而去帥多侍從或前宰執君悉心協贊疑事必爭遂信於樞密鄭公僑學有腴田甲既佃矣乙挾曹勢攘取君執不可富人高氏所養子十年不歸別命繼矣前子聞高病始來未三月高死反訴立繼不當漕符州右其說州追復避匿君謂久去驟來又捨喪次子道已

絕復職不可宗司素窘用君裁冗蠹裕公帑惠及宗子
人人自重知宗趙伯暹餽當得俸二百萬君力辭凡仕
閩者供張百須例數僧寺君一無所取提刑趙不过常
平林思齊復以名聞所至能大其官如此即所已試推
所未試盖可知已慶元四年三省類薦牘進宜守郴入
對言陛下臨御五年因循之弊未革薦舉不及廉靜殿
最多出經營文體未純士風未篤詔書寬大而州縣侵
漁名曰和糴而人困科歛諸軍老弱戰艦蠹散添差及

宮祠泛濫以一福州言之數倍高宗朝宜為限制以寬
民力上甚嘉納積官朝奉大夫逢次於鄉日與親賓享
山水園林之樂藏書踰萬卷平居事賢友仁尤為范文
穆公所知嘉泰元年三月卧疾夢入官府有金紫坐堂
上視之范公也傍一吏持文書請君書君難之寤而歎
曰范公六十八而薨我年今與之同非吉兆也稍愈即
求納祿七月丙寅竟卒君諱鋼字德堅一字紹祖娶龍
氏左儒林郎知處州會昌縣溥之姪先二十九年卒贈

宜人三子曰潞迪功郎融州司戶兼錄叅曰淵用致仕
恩補將仕郎曰次淵蚤世三女適顏元質王機餘天孫
男二人未名女二人惟張氏遠有世緒君九世祖家青
州仕吉州永新縣鎮將遂為縣人曾祖伯英娶左氏性
曠達踰嶺游海上諸山冀有所遇死於古藤祖志孤童
步挈父喪歸葬鄉人嗟異累贈訓武郎妣龍氏贈安人
父成將仕郎樂施周急梁溪甌險往來德之贈朝請
郎妣周氏贈宜人君事父母誠敬待內外族姻情文

交至無間言者少勤問學四魁漕舉登辛丑進士科愛
其弟沅江巡檢鎡承直郎鐸鎡亡教育其孤使有成立
與鐸以文藝相切磋故其二子習熟訓言潞拔漕臺上
庠解淵亦補太學生號稱儒家君嘗編類皇朝列聖孝
治自帝后逮臣民傍及藩侯蠻夷總一百卷表上之平
生著述號橫江叢集七十卷藏於家二年十二月甲申
葬本縣思賢鄉遺直里中村之原銘曰

志韞在中才瀑於外方其卷藏能否可蓋因官立事所

居乃大猗歟郴州士之藹藹兩掾方鎮疑決著蔡儒宮
縣道興利除害升佐閩藩帥守攸賴緒餘則然其施未
艾孰云專城旗弗及笈歸安斯丘懷哉永慨

文忠集卷七十四

欽定四庫全書

文忠集七十五

宋 周必大 撰

墓誌銘

墓表附

廸功郎致仕晁子與墓誌銘

嘉泰三年

晁氏自漢御史大夫錯以身殉國閱千餘年宋興而翰林文元公諱迥參政文莊公諱宗父子以文章德業被遇真宗仁宗繼掌內外制賜第京師昭德坊子孫蕃衍

分東西眷散處沭鄭澶濟間皆以昭德為稱蓋宗生仲
仲生端之端之生公公生子子生伯伯生世奕葉聯名
文獻相承奉天下無它嗚呼盛哉君生於鄭諱子與字
點仲魯祖端彥終朝議大夫秘書監贈特進祖詠之第
進士中詞科坐黨終朝請郎贈大中大夫有崇福集行
於世父公邁右朝散郎提舉廣東常平茶鹽與其弟公
昂公葉俱世其家常平嘗貳郡盱江遂居撫州是生四
子君其仲也夷雅重靜歷練世故事親先意承志曲盡

子職伯季死君力教叔弟子誰之子伯談以經術取高第君之子百谷亦早上南省紹熙中慶壽慈福宮年八十賜爵迪功郎拜恩已即卷衣冠藏之自號清容居士友賢積善委遠聲利得導引之術與親樂飲晝夜不倦每道故家遺俗四坐傾聽耳目聰明筆札精楷先六年書遺訓甚悉至是微恙猶會客書偈頌一首而逝實嘉泰元年十二月乙未壽八十有八故妻贛川陳氏徽猷閣直學士邦光女生男百谷也女適朱紹侃今亡矣孫

南世南

闕

女適何居厚曾孫女一人二年閏十二月丙

午百谷奉君柩葬臨川長安鄉長岡金魚塘之原伯談
方自畿宰選縣為六院以予識君踰一甲子而堂兄袁
州史君必遠先娶君媚遠來請銘惟文元公樂易純固
服道履正年八十四被疾絕人事屏醫藥盛服而終今
君人爵雖卑而性行綽有祖風壽稍過之是可書也銘
曰

箕疇錫福貴不與焉人有差等固難胥然若乃恭儉惟

德無載偽存心養性以事天翩翩不富而足用身康寧
兮永年終闕如君亦鮮矣庶幾五者得其全乎

歐陽元鼎墓誌銘

嘉泰三年

嘉泰三年三月癸酉故人歐陽彞字元鼎以疾終於家
其孤揆袖鄉貢進士蕭常狀來請銘惟吉州廬陵縣永
和鎮歐陽氏世名儒家君曾祖聚朝散郎通判澶州祖
景父襄有文行父嘗貢京師生四子弇變弁與君學問
文采人推四傑君尤雋敏年十三試郡庠下筆滾滾不

能休咸謂科第可立取已乃數奇銳欲投筆會隆興甲申從舅胡忠簡公以兵部侍郎措置海道君走江陰畫禦敵要策忠簡奇之遣深入覘敵得其要領而還規畫日有緒幕府當奏公而忠簡罷君歸築室滄江上地不踰畝書房潔雅左右圖書前植花木有清幽之致又闢栗庵日與闕進講學文筆素豪至是機杼愈新尤喜為詩悲歡登覽感今懷古一見於賦詠客至觴酌從容生計有無弗問也自以世著節義仕宦不絕彙次家譜哀

公所作碑誌聚為大編既以勉已亦詔後人其志豈淺
哉然念三世暨諸兄率不及下壽乃絕意外慕安於閒
適故得年六十有九平生著述總六十卷別有憤世疾
邪書三卷娶同郡蕭氏德慶府司法紹祖之女前九年
沒葬南山烏墨塘之原揆以今年九月乙酉奉君柩合
葬焉揆力學工文屢上南宮三女長適貢士黎法前死
次適進士袁佐侯鑑孫男三人士鳳士麟士豹女三人
予早與君兄弟定交晚歲歸里喜獨在而相望二十里

游從不數今銘其藏慨嘆何已銘曰

學而優科弗收適可籌機不投命悠悠心休休年乃脩
子拔尤紹箕裘銘闡幽安斯丘

朝請郎致仕劉君

大成

墓誌銘

嘉泰三年

嘉泰二年四月二十五日朝請郎致仕劉君卒二子朝
議大夫主管華州雲臺觀崇之

闕

仕郎立之以奉議郎

新通判歸州事某狀來請銘君諱大成字仲吉其先京
闕
年人九世祖翺唐末為建陽尉值中原亂占籍縣之

麻沙鎮子孫登儒科者相望曾祖植妣葛氏祖祐妣江

氏吳氏父南夫妣虞氏力學積善儲祉後人父預賓

闕

而沒君天資爽邁入小學賦詩輒有警句已而躋塲屋

閉門教子淳熙乙未崇之登第君年方強仕喜曰有子

成吾志尚何求就養長樂久留吳京晚歷瀟湘日賞湖

山之勝間歸鄉間稍築園圃與客觴酌吟詠休休如也

父母既亡一兄復早世教育孤姪不析爨者三十年周

恤親舊凡叩門求濟

闕

以緩急赴之接物謙敬尤獎借

後進有過亦規切之性嗜書手不釋卷前輩文集晝夜
編纂或質疑應答如響襟度曠達輕財重義里中推為
長者九被恩封自承事階極於員外郎享年七十有二
初娶劍浦宰呂希說之女贈安人再娶同郡彭氏封宜
人先六年卒二子一女劍浦之孫昭祖其婿也孫男二
綸純孫女三人君平生喜著述詩文夷雅似其為人積
至數十卷明年十一月二十日葬陳家岡與彭宜人同
域治命也時壬寅歲梁文靖公再相首薦崇之召對人

物倜儻議論慷慨孝宗罷之自勅令所刪定官連三遷
遂佐著廷會德壽宮上仙金人來致奠使副外別選朝
士為讀祭文官未幾完顏雍殂朝廷一視其禮特詔宗
之改右史往讀祭文縉紳宜之楊子曰無是父無是子
何待識君可以知其美矣銘曰

維得之宮維吉之逢八秩既開九命褒封有子方昌追
爵其重尚碑螭龜增賁揪松

宗室崇道武經公育墓誌銘

嘉泰三年

嘉泰三年癸亥七月丙子宗室武經郎主簿台州崇道
觀公育字浩養善寢疾卒將葬其孤以予識君數十年
請為之銘按魏悼王第五子諱德筠善書翰好為篇什
贈和州觀察使安鄉侯生第六子曰承裔幼聰敏真宗
召入禁中親授以書能應詔賦詩終棣州防禦使贈昭
化軍節度使祁國公生第三子諱克友仁宗嘉祐中御
書克友忠孝四大字又飛白龍鳳二字于團扇手解御
服雙鳳帶賜之終贈華州觀察使華陰侯即君曾祖也

華陰之子叔襲元豐中以右千牛衛將軍試文入高等
仁宗嘉獎加大將軍遷至和州防禦使著策數萬言陳
治安大畧卒贈徐州觀察使彭城侯累贈感德軍節度
使君祖也予嘗為史官參考累朝正史知文獻相承
諸王宮蓋鮮其比靖康中君之父守之為吉筠袁州臨
江軍巡轄馬遞鋪時先大父太師秦國公倅吉行州事
遣師勤王選充先鋒將及淮聞敵去而還大父以恪謹
薦于朝其後隆祐太后避狄如贛吉守揚淵募兵從衛

檄守之暫攝州事今二牒皆在終武節郎贈武義大夫
君開爽而謹飭幼夢游佛國故酷信釋氏至捐貲創精
舍寶安山紹興十四年以父仕補承信郎三遇覃恩及
勞累年轉今官歷任十有五至監吉之在城稅永和鎮
酒稅江西湖廣撫司準備將領闕員外置五監潭州南
嶽廟四奉台祠中間吉之造船場贛州都作院整務其
恬于進取蓋出天性事親友孝敬遺命從塋親側以十
月丙午歸窆其地在廬陵縣美化坊趙家塘之原享年

六十有八先娶歐陽氏伯虎字炳文長子國材之女附
郭舊無園圃炳文獨好事頗識前輩即城西植松檜花
木飲客賦詩君以是及與名勝游再娶張氏宣教郎簽
書挂陽軍判官廳公事安孫之女俱贈安人七男彥伍
承信郎監南嶽廟彥偁成忠郎監德慶府稅務彥徹承
節郎亦監嶽廟前卒伉再與漕薦受遺澤餘夫三女長
女適潮州通判嚴康元之子植次適彭希孟一未行孫
男九人洌夫得夫直夫濳夫潯夫云夫餘未名女五人

長適劉鐵次許嫁劉溶餘在室曾孫女一人銘曰

世襲文儒天族之盛時方宗強君獨難進無怨無數不
貪不競貽爾子孫尚篤其慶

澹軒李君

呂

墓誌銘

嘉泰三年

嘉泰癸亥秋邵武軍光澤縣進士李閱祖袖書過予繼
示其父隱君澹軒集十五卷朱待制熹元晦手書一大
軸及鄉先生大常伯黃簡肅公之子衡守瀚所述墓文
來求銘章予讀隱君之文大抵有補名教且知為元晦

益友又衡州父子盛稱其賢是可銘矣按李氏自唐末
居光澤君諱呂字濱老一字東老高祖大理評事鐸能
詩教子始為著姓曾祖太常博士誥贈朝請大夫陳忠
肅公稱有古風祖濬不仕太常卿李夔實銘之父純德
有學行特奏名及元晦誌其墓云利不自予惟義之取
其源遠矣君幼端莊自重記誦過人十四喪父能自力
于學從叔山先生郁盖元祐黨籍諱深之子紹興初特
起者也年四十即棄科舉讀易六十四卦皆為義說觀

史傳百家之書尤留意資治通鑑手抄至數四凡興衰得失論著數百篇事母上官氏極其孝敬教育弟妹使有成立聚族千指昕夕擊闕集衆致禮饗堂前後序揖自少至老不以寒暑廢或勸少休君曰身率猶怠矧自怠乎為會宗法歲時設遠祖位合族薦獻飲福秩然其可觀也平時容止詳雅居無惰容學務躬行深惡口耳之習既切切訓其子孫又以是善誘後生尤不喜言貨財苟可用物利人則勇為之邑宰張訢以春夏季糴立

社倉平其價下戶俗不舉子議給粟助養育行旅有病
創屋療治條畫精明隲括纖密多自君出元晦作記歎
其負經事綜物之才老而不遇也予觀易首乾卦而以
元亨利貞為四德文言曰利物足以和義蓋和于義乃
得其義可以利物也禮記大學亦謂國不以利為利
以義為利小人反是然則合義利而用之斯不易之理
獨孟子告梁惠王曰亦有仁義而已何必曰利截然判
而為二蓋戰國之君知有利為利不知以義為利所謂

易經大學彼惡能知辭而闢之特不同耳若君者其善
學易經大學孟子者歟慶元四年六月壬辰以疾考終
享年七十有七六年六月乙酉葬所居之烏程縣先娶
高氏郡人挺之女再娶黃氏御史臺主簿章之女簡肅
公猶子六男紹祖懷祖閔祖相祖襲祖壯祖五女適

闕

林郎馮森進士鄧潭饒淵上官嘉會從事郎吳炎孫男
七人宣子方子文子容敏學敏行夢錫女七人曾孫男
八人文子登紹熙五年進士第今為建昌軍新城尉銘

曰

以義為利君子攸行以利為利彼哉小人我嘉李君隆
師親友允蹈經訓知之非苟家範昭然守之勿諉奕世
其昌視此銘言

循吏石大夫

畫間

墓誌銘

嘉泰三年

古者諸侯世守其國故孔門高弟學道愛人見於宰
邑自罷侯置守兩漢循吏二千石為多邑長間有聞焉
國家養民以仁尤注意郡縣而為令者每急催科緩撫

字或用智術籠民以冀辨治守亦用是殿最屬邑一遇
水旱賑恤具文而已豈無循良恨予聞見不廣若乃耳
熟而心服者石君也初為鄞縣首白郡請寬賦歛退與
民為期會寬而信簡而明每患州給稅薄不以時至
則主簿拱手信吏之科重疊君即縣廳創副簿鈔至昕
夕躬為銷註臺府謂迂不及事且將累我議易它曹父
老嘆曰吾得賢令而上司不察必擇健決者來民其無
聊矣相率租稅於省限之前送使留州視舊反羸舊例

三歲推排物力則鄉郭戶畢集官為度地立屋以處之
又大比取士環貢院為廬舍待赴試之士用一徵十不
勝其擾君示以間架任民自為事畢徹去吏第行文書
不得措手東錢湖當開付之食利戶郡庠講堂壞分委子
弟在學之家誠意既孚爭勸成之此治縣之政也上饒
歲大侵舊負上司錢及諸縣未輸常賦通十三萬緡君
置不問明許六邑訴旱毋敢不實倚郭十三鄉惟靈山
石人二鄉灌溉有秋自無一詞君力請於朝蠲秋苗十

七八留二三備州用盡發常平倉其勸分不以貲產先
察畜米多寡諭教故倚郭得米二十餘萬斛它邑各以
萬計境內置回環場四十七所各給本錢且糴且糶循
環無窮擇土官信實者主之凡下戶行旅所至持錢得
米無贅聚遠求之患別令鹽商得米四萬置三場城中
郡當孔道將迎餽送一切謝絕時以家疏待所委官議
者謂救荒之善前所未有此治郡之政也使達而理於
朝廷之上四方之遠何事不濟豈止一郡邑受惠乎今

君季子宗萬以江陰守王桷狀來請銘故詳叙所聞用
第其官闕於後君諱晝問字叔訪紹興府新昌縣人其
先本姬姓衛康叔之後有靖伯食米於石因以為氏自
大夫碯著名春秋至萬石君遂顯於漢本朝秘書丞通
判保州諱待舉萬石四十世孫於君為高祖雲翼軍亂
扞禦死之安定胡先生為之銘曾祖左朝散郎贈金紫
光祿大夫諱愆之祖左朝奉大夫尚書祠部郎中贈朝
請大夫諱景術考諱公揆紹興七年歷察官殿中遷侍

御史八年樞密使秦檜再相君連上疏論其失以左宣
教郎除直龍圖閣知撫州數月落職罷送隣郡取勘道
被疾卧家幾年而卒君方十四歲奉母令人李氏屏居
山寺苦學工文詞不敢出應科舉秦薨上書訟寃詔復
職與恩澤補將仕郎銓試為首循修職郎監秀州華亭
縣造船塲尋克湖廣江西京西總領所幹辦公事丁令
人憂服除監淮西江東總領所大將庫金陵權要所聚
日事宴飲未嘗營職君獨整比簿書出納必按公牒乃

行同列或竊笑會新總領閱實局務官吏多獲譴惟君
掌大軍錢券銀鈔無毫釐差前後箭鏃山積君欲稽其
數吏謝不能君先為廢屋一楹收數儲之遂以為率而
得其實秩滿用舉主改宣教郎治鄞為浙東諸邑最守
臣岳甫以聞有詔曰堂審入幹辦諸司料院淳熙十五
年春也鈎校百司廩給參驗京師豐約聚為一書所居
官不苟類此明年冬遷軍器監主簿紹興元年冬轉為
丞二年輪對論兩淮今日根本之地權場互市洩違禁

之物營田官莊為豪民所占遺財遺利官兩失之乞如
國初擇人久任又請因赦搜訪不求聞達之人上皆嘉
納三年春進承大府鹽鈔鉅萬異時吏或代書君弗懈
益勤繼燭籤押迄今不廢戶部絕寺吏非其罪公辦數
弗從請郡而去以四年春視事荒政既修特命增秩仍
以司封郎官召併下回環場之法於諸路君懇求均逸
主管武夷山冲佑觀而增其秩慶元二年知撫州再請
冲佑許之會長子宗昭自密院檢詳除漕淮東侍君以

行四年二月二日卒於儀真先是君歲以穀百斛給宗族之貧者疾革申言之夜召家人訣別索衣欲辭家廟遲明啟手足享年七十四官至朝請大夫五年十月十二日葬會稽縣小江昭福山之原妻同郡諸葛氏封宜人二子宗昭朝散大夫今直華文閣端亮文雅用不究其才次宗萬也君卒而為從政郎廣東經畧司主管機宜文字今為大庾宰赴審官孫男九人孝則婺州浦江孝順徽州歙縣孝時婺州永康縣並簿孝溥以建昌運

司戶參軍登慶元乙未進士第今俱迪功郎孝隆孝修
並將仕郎孝裕孝詠孝廣尚幼女三人未行惟石氏遠
有名世欽儒科不絕君伯父公弼在徽宗時光顯於朝
著譜牒歷歷可考君雖從門蔭再上禮部所著詩文數
十篇藏於家其溫恭篤實待親舊有恩意臨事則毅然
自守人服其正將死不亂其所養可知矣銘曰

學優而仕澤施於人惟令若守於民莫親君承萬石溫
溫其仁於勤於信政以惠成辰乎來遲而不弘均誰傳

循吏尚考斯銘

登仕郎董君

億

墓誌銘

嘉泰四年

君諱億字永年吉州永豐人世儒家曾祖諱獎贈少師
祖諱德元早以學問器量重於鄉晚以廷試魁多士被
遇高宗歷院御史貳天官以中大夫參知政事以端明
殿學士提舉江州太平興國宮徙居城中遂為大族考
終於家贈通奉大夫父諱克忠承議郎通判永州轉朝
奉郎致事君生而聰敏稍長靜重疏通年十四喪父永

州送終盡禮事母夫人王氏極孝謹姊妹四人使皆有
歸即先廬竹林闢觀過齋聚書萬卷日延賢師友講貫
道藝未嘗泛交別墅在城東創潛樂書院時與親賓尊
酒論文畧無子弟過失嘉泰二年十一月十八日以疾
逝纔三十有二聞者嗟惜妻周氏子堂兄袁州使君諱
必達之孫其父繹也予遇郊恩以親屬奏補登仕郎君
方力學起家孰謂其止此病棘時手書從事纖悉無遺
初與從弟偲同學為娶婦成其家至是謂偲我不幸早

孤常恨先人悠邈它日當卜葬近郊二塋子介同一女俱
幼宜教育之以四年六月壬寅寔廬陵縣儒行鄉昭議
山之原附郭如君志為之銘曰

世祿之家惟禮克由性靜者仁壽胡弗修百爾所期一
之未酬天耶人耶何怨何尤

譚君 紹先墓誌銘 嘉泰四年

吉有壯縣曰永新邑人舉大族必曰譚氏或問何如其
大也親屬盛歟常業厚歟仕宦衆歟非也以孝友保其

家知取子守其業傳詩書允厥宗斯可謂之大矣君諱
紹先字顯仲世家永新六世祖瓊七上南省一經相傳
至曾祖華華生傑特奏入官終融州軍事推官以承事
郎賜緋魚袋致仕贈朝奉郎二子長觀光登政和八年
進士第終朝奉郎贈通議大夫次觀成即君之父也君
敏秀嗜學繼母携前夫子來君事之盡孝又分貲友之
人服其義治生勤儉而周急恤貧療病葬死始終不倦
接物和易處事平允見謂長者淳熙乙未茶冠入縣君

具舟濟人遇棄赤子者悉為收養事定歸之脫人於阨
却其餉謝率以為常慶元丙辰十月十九日終於家享
年五十八後二年四月九日葬才德鄉塗山之原娶漢
陽太守劉彥登之猶子先十年而沒二子涇湘君在時
延名儒教以學有聲場屋三女適進士王維翰儒林郎
廣南西路經畧安撫司幹辦公事周稷進士顏元寶孫
男吉孫宜老女尚幼昔我先公與朝奉同年登科而其
壻稷又予同闕涇等以實謨閣直學士誠齋楊公狀來

請銘其詞曰

家以仁而昌產以義為常仕以儒有光具三者族大矣
尚奕世其毋忘

從政郎宋君

似

墓誌銘

嘉泰四年夏

君諱泌字仲子姓宋氏上世自睦州徙婺之金華曾祖
正祖裕贈奉直大夫父有朝奉郎郴州禮部郎官呂祖
謙伯恭誌其搢以清直君孝謹守家法讀書學文年五十
三從世父蔭以迪功郎尉徽州婺源境有劇盜捕獲而

辭其賞循修職郎吉州錄事叅軍郡守治獄任情君日

抱案牘

闕

辨數被摧辱不懼不悔有斷兄足而取其財

獄成守導囚聲冤劾君失入刑部直君守滋怒窮治過
失無所得終更士夫爭賦詩餞行貧就南銓以從政郎
主賀州錄叅獄奏淫祠毀之人始駭終服富川縣兩年
十易權官君適秩滿郡守錢聞詩辟君為令刼盜繫獄
察其誣舍之俄獲其盜人以為神後守督民積欠君不
可諸右君守疑妨已奏君不催科坐免民泣涕挽留至

折車軸得它馬馳去朝士誦其寃君曰吾不可再誣於人請監潭州南嶽廟而歸家居蕭然不累於物病亟手書戒其子強學力行勿惑陰陽之說喪葬稱有無而已麾左右正卧而逝享年七十有四嘉泰三年十一月庚寅也娶杜氏劉氏皆前死生四男長九齡季珏早世仲升叔皆進士四女長適蔣端益次適李損之二亡矣孫女尚幼君所至以清白稱為尉却催夫之金掾曹翰納餐錢外凡印鈔例給者一毫不取每罷官囊無餘資惟

喜賦詩積至千餘篇其清修如此升等卜以四年九月
甲申葬安女鄉祖塋側遠携故人子呂喬年狀來請銘
始紹熙甲寅春予自湘中易帥豫章歸廬陵郡官旅望
謁君翛然竊立固疑其小異已而果賢是宜為銘其銘
曰

事親謹而畏涖官剛且毅從所好以求富思於已為良
貴囂囂其心暨暨其氣發幽潛以銘尚生平之慰

墓表

朝奉大夫致仕李君迎墓表

慶元三年

河陽濟源多名族顯宦張氏李氏實相甲乙通婚姻南渡後祖母秦國張夫人每與李氏子弟篤叙親好予於其間敬愛兩人曰隨字可大廉介謹飭治縣有聲而其族弟諱迎字彥將行安節和恬於進取予尤重之可大沒已五十年彥將下世亦二紀念之不忘也彥將之子數求予表先墓乃追紀聞見而考信行狀之說如左李氏胄出唐宗室汜水王本朝有諱感者以儒學起家至

君曾祖章繼擢進士第以太常少卿致仕贈少師祖百
朋中奉大夫致仕贈少傅父弼儒右中奉大夫直秘閣
致仕贈少師妣姚氏曹氏趙氏秦魏楚國夫人君姚出
也欽宗登極秘閣為兩浙轉運副使君以捧表恩補將
仕郎調婺州都稅院發運使檄應辦王德軍錢糧循從
事郎故相趙忠簡公稅鎮豫章辟知靖安縣又從金陵
行宮留守為準備差遣歷温州軍事推官程邁梁汝嘉
閭丘昕號吏師皆以待從出守事多委君程當歲暮移

閔帥留至正月以薦章授君乃解印有錄事參軍老而貪已授代為嬖吏所持君械繫掠治吏叩頭服罪同僚咨美舉員應格改右宣教郎知臨安府錢塘縣歲旱留運河水溉民田會金國使至漕臣諭君撤壩通舟君固請留其半漕怒拮撫無所得至用前政陳炳科里城埽事劾君失政坐是罷起知湖州歸安縣外艱不起知婺州金華縣提轄行在襍賈務雜賣場郊恩賜銀緋求外補充福建路安撫司主管機宜文事再為提點鑄錢司

主管文字乾道初代還

闕

相洪文惠公與君有舊君資

歷常為二千石纔得通判臨安府朝市浩穰非所好也
丐易主明州浙東總管曾覲以代邸恩數薦進人才其
門如市知君京洛故家屈意願交尋召還人謂必有裏
言君適秩滿即袖牒從太守丐保明奉祠竟主管台州
崇道觀歸寓湖州新事鎮蕭寺中手抄聖賢治心養性
之要時時賦詩自樂成百篇舊藏畫像惟肖淳熙元年
六月自題贊百餘言其畧云三仕三已因緣而止一丘

一壑倦游而歸耳目鼻口盡史或得其髣髴至於超然
物外彼亦安知其端倪也耶俄遇微疾沐浴端坐而逝
是歲九月丁未也弔者始悟自贊之意云享年七十有
二明年正月乙酉葬湖之烏程縣三碑鄉金山原秘閣
墓之左以子升朝累贈中奉大夫妻令人周氏永嘉名
士周行已恭叔之女恭叔官京師與秘閣善君未弱冠
風度凝遠能文辭善談論故以女歸之後君十一年年
八十三而卒附君以葬四子結故朝奉大夫尚書度支

員外郎總領四川財賦軍馬錢糧綜早世紱故從政郎
平江府司法叅軍綺故為從政郎新泰州如臯縣令女
二人宣教郎王光達朝散大夫新知真州事張顏其婿
也孫男七人大成新池州青陽尉大雅新寧國府太平
縣主簿大鈞新高郵興化縣尉迪功郎次大有大鼎大
亮大倫皆故孫女七人初秘閣之沒君子二當受遺澤
其一遜弟之子人服其義君潔靜通敏有可用之才知
闕方在朝輒違而去之長子持節近甸人以為榮君視

之澹如也惟榮辱得喪未嘗屑屑宵次故其終神識湛然可以窺所蘊矣今諸子惟如臯在即求表君之墓者行狀蓋真州之文也閏六月日具位周某述

彭孝子

千里

墓表

慶元三年

慶元元年十月癸丑吉州永新縣彭孝子卒卜以三年十月癸酉葬禾山鄉石峯之原邑令張大正為之傳其子之誠衰經踵門復求予一言予謂人之行莫大於孝令既傳而贊之尚求一言闕曰節以壹惠傳猶謚也不

表氏族於墓後嗣奚觀子聞仁宗朝大常博士周君居父
喪倚廬三年不飲酒不食肉言必戚哭必哀喪母癯然
盖久而後復當是時歐陽文忠公為作墓表極論古今
喪禮之廢推為篤行君子惜乎歲久石本莫傳而京浙
閩蜀所刻公集暨書曰某州縣人三代諱某此猶可也
併其人亦曰名某字某如此則其子孫切切顯親之志
荒矣亦豈公表於金石垂勸來世之意耶予每嘆息於
斯文乃考之文知其為天聖二年進士然是歲周姓登

科者不一莫知孰是又考其宦游多歷湖廣而墓在道
州之永明竊意為道之賢者也亟求春陵郡志視之本
郡果有周堯卿字子俞行義與公所書合於是刻之定
本使其名字昭昭於無窮予心庶幾焉昔公嘗自云喜
傳人事尤愛司馬遷善傳奇偉使人喜讀欲學其作厥
後著五代史辭氣遂與遷相上下若予者愛公之文猶
公愛遷書也特不能學公文如公之能學遷爾然公猶
遠取一它邦之孝子如堯欽者為發明之今彭君近在

同郡苟無一言非能晞顏者也乃為記次不辭君名千里宇時學曾祖儒祖居鎮父柵世業儒君四歲而孤母聞母孺人周氏語及其父輒號絕久之自是事母盡孝母年八十餘始終如一日蓋於生也致養竭其力死也送終極其哀君所謂視膳嘗藥扶持左右負土廬墓事亡如存者大抵以為常故宗族儀之強暴化之凡傳所載殆出於鄉評予亦不得而畧也君醇實寡言笑平居於人無睚眦之怨惟喜讀書教子四男闕之

誠潭出繼兄後女適劉喜十孫欽鑰銓鑄鉉鎬鎡鎔鏐
鎰一女在室當君無恙時之誠鑰相繼舉於鄉紹興甲
寅值慈福宮慶壽恩封迪功郎妻顏氏亦封孺人君年
八十六而終皆積善之報云九月十八日具位周某述
并書

文忠集卷七十五

欽定四庫全書

集部

文忠集卷

七十六至
八十二

詳校官原吉_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣黃嵩齡

謄錄監生_臣沈立銘

欽定四庫全書

文忠集卷七十六

斗園續稿三十六

宋 周必大 撰

墓誌銘

廣誌附

益國夫人墓誌銘

嘉泰四年三月

亡妻王氏世為平江府崑山縣人曾祖申以學行推於鄉王荆公倅舒州奉詔親勞至即求見迄今手刺存焉祖億積善好施贈中散大夫父葆通經能文登進士第

歷監察御史司封員外郎兼國子司業除大理少卿知
廣德軍漢州帥瀘南易池州終浙東提點刑獄母宜人
莊氏夫人聰敏高潔女工儒業下至書筭無不洞曉然
非所好惟以孝友靜順為心十六七而祖母史令耄期
卧疾喜怒不常左右莫敢近夫人晝夜奉藥餌獨得
懽父母奇之年十九歸於我抱闕行都月奉微甚夫人
樽節有方不見匱乏分教金陵寢以成家簿書米鹽躬
自料理迨為學官館職相與商論古今手抄經史夜則

教兒讀書稍倦對博奕或至丙夜紹興末郊恩孺人輩

恩進安人隆興改元封

闕

子解掖垣歸吉州閒廢七

年祠祿滋微夫人虔共賓祭承上撫下應酬日多凡予
羣從諸甥婚姻樂為主盟弗計其費惟朝夕誦歸寧父
母之詩聞外舅疾星馳省視乾道間予貳麟省封恭人
淳熙中由八座二府夫人迎外姑與兩兄偕來方有悵
意封碩人淑人安康文安咸寧三郡夫人稍按歌舞娛
其親久之母兄繼亡始忽忽不樂矣既封永齊越鄭周

吳六國復從予胙蜀土則曰均大邦也遇恩忽復請平
居常言富貴非吾事若得第三間隱居林泉世務不入
乎耳是吾心也甫年二十二得子喜曰吾責塞矣自時
相待如賓居家勉予以睦族無競當官則勸盡瘁國事
勿恤其私予三入承明率坐論事蒼黃去國夫人整比
行李收拾文書纖毫無失蓋規模素定也知予性慵規
以克勤御下太寬欲其有制閨風肅然歲時享家廟酒
肴茗果悉經已手中外親賓親踈輕重待之中禮而以

飢飽暄涼為衣食節以是仕不內顧退樂安閒蓋有賢
婦力也稟氣差弱少壯時勞其心力嗣後遇天寒輒病
去冬卧疾累日亦以為常俄廢寢食遂薨實嘉泰三年
十月十七日享年六十有九一子朝請大夫行大理司
直綸也夫人已病念綸奉薄手取白金馳介助之孰謂
奄忽至此嗚呼痛哉孫男宣義郎顯女五人長許嫁承
事郎監嘉興府糴納倉蕭彖餘幼卜地在廬陵縣西數
里儒林鄉斗岡之原癸用四年三月甲申行實如此無

一語闕
銘曰

嗟我於君長幾十年君髮尚鬢我久皤然孰云一朝棄
我而先失此有益矧伊婦賢有問誰對孰舉我偏芳翰
盈篋遺挂滿前哀辭寫心苦淚迸泉豈無名公運筆如
椽陰幽坤從他人莫先謂予不信皦日在天

太恭人司徒氏墓誌銘

余再直禁林居第在臨安之俞家園每見北宋朝士盛
言高司農有賢母會司農米下鄰益知其詳先是紹興

十一年金人再和司農之父贈朝議大夫諱薄世居海州間道歸朝上書陳恢復大計秦丞相不納後四年遣隨衆北去憂憤而卒司農年甫十三太恭人日夜教育之使毋忘父志十九年冬完顏亮戕其主亶明年營都燕山二十九年又治汴京謀南侵三十年春東海民徐元張旺史整共起三帥以帛書求援於我我守盟約不敢報元等嬰城半年敵師水陸夾攻破之誅戮極慘酷亮由是益疑我得中原心決策入寇起蕃漢兵二十

七萬僦人不與焉倣唐制分二十七軍明年自將巡洛至汝遣高景三王金來求霧太恭人聞之密語諸子汝父常謂敵必敗盟今事急矣我守節教汝曹正為今日乃相與自拔歸懼陸行不免密與忠義家五十餘人航海而南朝廷嘉之司農兄弟皆得補官俄南北交兵魏勝克復海州都督府檄司農為州從事奉親還故鄉敵連三年攻圍不置司農冒矢石分守東壁屢瀕于殆賴張子蓋大破敵師圍乃解隆興二年割棄海泗司農來

家江南自此被遇壽皇更中外使任嘗褒諭云不易卿
將母遠來今可以養矣擢守安豐軍部使者強取僚郡
之妾其人訴諸朝當路意有所徇事下守臣司農將直
之入白太恭人曰竄逐非所畏慮貽母憂奈何太恭人
曰吾母子仗義來歸自分必死汝蒙國厚恩為二千石
苟能公以報上吾獨不能為范滂母耶司農竟坐徙施
州自淮泝江歷盡三峽之險太恭人處之怡然秩滿入
對上勞之曰卿母勿復憂遠適留為度支郎官遂二司

農淳熙七年夏出帥江陵太恭人安享榮養年八十有五九年七月二十六日以微疾坐而逝按司徒氏本河北人五代廣順元年禮部侍郎充集賢院學士判院事知貢舉諱翊者太恭人遠祖也後徙海之朐山曾祖恂祖儼父庠母顏氏自幼聰慧過人通儒釋書歸高氏不逮事舅姑傾資送以贍夫族鄉人義之初該德壽典恩封太孺人郊禮封太恭人高君先娶趙氏生二子大亨故迪功郎秉故將仕郎二女適進士陳公輔將仕郎趙

堅太恭人惟生司農人見其均一莫知為各母也孫男
六人蟾叔豹賜叔夜皆前死今叔獻為修職郎特改差
淮南西一路安撫使主管書寫機宜文字叔夏將仕郎
孫女八人二早夭次適進士朱邁修職郎臨安府仁和
縣尉王頤文林郎平江府吳江縣丞趙炳餘在室是歲
十二月二十四日葬南康軍星子縣丹桂鄉黃龍山之
原司農數來請銘有校書郎項君安世嘗家江陵言太
恭人臨終作誦超然生死之際荆人至今稱之余維婦

人隱德閨門非遇事莫顯既顯矣抑而弗揚何以成人之美故為第其初終繫之以銘司農名夔今為朝請大夫右文殿修撰歷典名藩制置鄞縣海所至有能聲皆母教也有定庵集五卷銘曰

少而鞠子教之忠老則知命全其終此烈士之所難何夫人之能充表而出之可以繼烈女而傳無窮矣

太宜人李氏墓誌銘

慶元六年

慶元丁巳正月庚辰故人朝請郎新通判袁州曾光祖

卒母太宜人李氏年八十有五人皆憂其悲傷莫能久也戊午冬果卧病子孫迎醫進藥宜人却之曰命繫於天吾年已高何以藥為十一月己巳振衣而逝諸孫列家世行實來請銘按宜人世為吉州安福縣人曾祖允祖崇父宗孟俱不仕生數歲從兄弟入小學通經大義未笄嫁同邑曾君嘉謨後贈朝請郎方嫁時朝請之祖弼妣劉氏父序昌母許氏四親俱無恙宜人恪勤婦道咸得其歡心相繼壽終協贊喪祭禮無違者朝請初用

賞補迪功郎賀客滿門宜人獨以不能決科為言既尉
衡之常寧廉勤有聞內助為多生二子光祖字景山
光朝字景章擇師友教以學已而皆舉于鄉淳熙乙未
光祖遂登第宜人喜謂朝請曰足以伸吾夫婦素志矣
朝請晚得末疾宜人悉意家事日治具延賓客以娛樂
之如是者累年朝請卒從景山官遊四方甲辰丙午甲
寅歲朝廷連講慶壽禮一賜冠帔三封至太宜人築堂
於居第西偏故相京文忠公書壽衍堂闕以寵之生朝

大集內外親姻元孫百晬嬉戲膝下邑宰率僚佐升堂
謁賀易其坊曰椿桂太宜人悅甚告子孫曰汝家獲見
五世復遇聖天子以孝治天下有此榮樂盡思所振乎
自是良辰美景必載酒游後園子婦孫曾必交起為壽
人方羨慕不幸景山一人不得終養光朝素孝弟力學
嘗五上春官對策集英補光州助教版授象州學官至
是順適其母者百方迄不起疾後數月亦歿卒蓋己未
五月辛亥也宜人二女長適修職郎賀州臨賀縣主簿

歐陽巖次適進士劉偉孫男七人鄉貢進士俱早世次

仲次鄉貢進士德次儉价仲興闕女三人適進士羅闕

王長民迪功郎隆興府新建尉趙師曾孫男十人士遜

將仕郎士邁士進士遵士通士選士逾士逢士達士遇

女十六人劉鑑劉鋼王多吉其婿也皆進士餘尚幼元

孫洙宜人性雖寬和治家則嚴而有法每事責己不求

備於人周恤困窮畧無吝色鄉黨賢之葬用庚申十二

月甲申地在縣東新樂鄉桃溪之原而光朝以人生享

備福今復為銘詩以哀之庶幾存沒其少慰乎銘曰

猗夫人之存兮五世

闕

乎其前嗟夫人之老兮家子棄

之而先

闕

傍觀且叵

闕

兮奈何慈愛與鍾憐縱強壯猶

傷生兮矧耄耋之衰年噫有樂則有哀兮相舉世其皆

然惟有始必有終兮孝不辱而歸全嘉夫人之遠理兮

謂賦命之在天幸孫曾之克家兮謹送往以無愆紛萬

目其式瞻兮曰此壽母之新阡揭銘章以示後人兮夫

人其何憾焉

段夫人墓誌銘

嘉泰四年

嘉泰三年正月癸巳鄉人李圖南之夫人段氏以疾終享年六十九年二月己未葬吉州廬陵縣移風坊豐塘之原圖南悲不自勝屬予誌其藏予惟內子與夫人同生已外亦以去冬謝世予自悲不暇而暇紓圖南之悲乎力辭不可則為之銘夫人諱淨方於吉為儒家有兄弟登科歷顯仕者曾祖居簡祖公輔父子沔夫人幼失怙恃克自植立端靜明敏女工如夙習踰笄歸李氏

族大而貧夫人竭力成其家姑太安人王氏壽百年矣
夫人與饋不懈歲時班白奉甘旨稱壽太安人每為盡
醉因為孝婦至於勤身率下動循法度賓祭孔時雖貧
不減富室待妯娌至敬撫妾婢有恩無妬忌諸子能言
即教之誦詩訓以遜弟稍長勉其為善彊學生平質直
好義不妄笑語嘗瘠己周人之急親族姻戚視其儀則
皆以女師推之四男如圭中童子科特補迪功郎又中
進士今為從事郎夔路安撫司主管機宜文字如璋前

天如岡如金皆早成三女如蘭遙鄉貢進士劉泳如華如英尚幼孫男二人孫女一人銘曰

久事君姑孝而恭克相良人正且容詩書教子華厥宗石帘目徯開新封奄兮植此柏與松嗟我老諱管豈彤隱宮遙躡靈之蹤悼亡有涕非無從

壙誌

汀州田史君妻宜人尚氏壙誌

慶元三年

宜人尚氏世家相州安陽縣其先多文武顯人朝奉郎

贈大中大夫諱禁曾祖也國子祭酒佐均祖也承議郎
賜緋魚袋諱大伸父也母孺人周氏實予女兄聰明孝
友有烈丈夫之風年十六歸於承議郎三年而宜人生
既長和順勤儉知書達理女兄鍾愛遴擇佳婿隆興癸
未歸今汀州史君朝奉大夫田豫事姑太夫人興事母
同而加敬焉承撫內外無間言者初以予奏賜冠帔從
夫封孺人安人宜人子多不育今惟一男將仕郎墻
田氏家與南康縣與贛為鄰歲常往來尚氏居於廬陵

兩邦雞犬相聞，宜人友愛。弟妹猶以為遠，慶元改元仲弟振裔承贛之瑞金，攝屬外臺，宜人携其子過故居視之，會得疾，盡屏外事，泰然而卒。八月辛酉也，享年五十有八。汀州失內助，追悼切至，而太夫人每於親族言失吾賢婦，未常不涕下也。先是汀州皇考御史、興縣東十五里芙蓉鄉良山之原，卜三年六月庚申發，宜人之柩附先塋五十步間，謁予以文，予自哭。女兄今三十有二，年間與甥遇，必惻于心，奄其已矣，悲不能文。姑為記歲。

月以寫老懷以釋汀州之思云

又

村女壙誌

平園老史周某孫女村娘以淳熙壬寅十月二十四日
生於樞府父綸今為朝請大夫行大理司直母宜人劉
氏村女端靜通敏喜讀書甫八歲予罷相已能佐祖母
益國王夫人治行字人皆異之年十三以紹熙甲寅五
月一日病沒於吉州舊居東山堂權殯功德寺祖父母

父母悼念不忘嘉泰癸亥年冬益國夫人薨卜以甲子
三月甲申葬於廬陵縣儒林鄉斗岡之原前十二日舉
村女之柩瘞塚傍泣而誌之

文忠集卷七十六

欽定四庫全書

文忠集卷七十七

平園續稿三十七

宋 周必大 撰

墓碣一

朝散大夫知新州李君

守柔

墓碣

慶元三年

君諱守柔字必強姓李氏其先青州義光人皇祐初徙家桂林今為靜江府臨桂人也曾大父穎卜居長安市好善樂施藥病殮死里中德之大父闕銓父允彥安分

知止不飲酒食肉者二十年預知死日端坐而逝後贈
奉直大夫是生四子君其季也與兄守卓自幼立學守
卓登建炎二年進士第次舉君又繼之紹興二年也補
左迪功郎象州武山尉用舉者陞左從政郎宜州忻城
令歲餘丁母秦氏憂服除調雷州海康令稽考簿書得
隱戶甚衆丁以萬計州並海而富舊無外城每虞寇至
太守王趯號能吏君與協力大興版築踰年城成邦人
繪像以祀諸司交薦改左宣教郎知道州營道縣丁奉

直憂不赴免喪知賀州臨賀縣初趙忠簡公自潮再貶
過雷守令用故相禮迎送仍具海舟濟之至是有告
於秦丞相者守趨去已久攝繫大理獄下廣西追治官
吏根株牽連君緣坐十年不得調秦薨始磨勘轉左奉
議郎通判容州屬令醉酒即席攘臂侵君明日太守劾
之君謝曰飲人狂藥奈何責以正禮闕郡歎服徙通判
邕州守武臣御下嚴而衣糧不時給將大閱衆洶洶守
窘甚君許其移病為攝州事下令人都肄日先發帑廩

給諸軍衆謀益壞後數日乃赴教場引謀亂者四人立
毒縣下斬其渠魁而鞭三人訖事肅然尋知梧州郴賊李
金聲搖四鄰君逆為之備賊亦不至廣西衆水匪梧下
封以達於海舊設禁港杜米舟會歲儉貴糴漕司申其
禁君曰是壑鄰也格不行東路及閩浙皆賴焉詔臧否
郡守本路以公最聞選知宜州南丹苜蓿延篲與永樂
蠻相讐殺驚擾遠關君遣攝天河縣主簿徐彌高偕吏
士好諭之兩族聽命秩滿求主管台州崇道觀歸築良

軒蓋將止矣中書舍人范公成大出

闕

力薦君於朝

且趣君行起知新州對論邊事稱旨執政議推南丹賞
君曰此徐彌高之功也詔特補彌高徽州文學諭推恩
有差行次蒼梧以疾卒遺民多泣涕者享年六十有六
積官朝散大夫君天資篤厚喜賙貧乏如其先世念長
兄之不仕為官其子妻宜人呂氏前十四年卒一子杞
宣教郎新知袁州分宜縣二女長適通直郎通判容州
蔣稷次適朝散大夫廣南東路提點刑獄公事唐弼孫

勲將仕郎君之卒在淳熙三年正月十四日以五年正月丙申葬長安東高磊山先塋之側予不識君而與君之子及提點刑獄善屢以奉議郎武學博士蔣君來叟所狀事實求予一言予嘗嘆二廣去朝廷遠事多陸沉每聞一善樂為稱述又嘉君嘗禮遷客而阨於進特表而出之銘曰

附炎速化援溺疾顛孰避孰從彼人我天嗟吁新州不調十年天定勝人謂將騰騫良止之思素心則然壹惠

可節表於東阡

二戴君墓碣

慶元丙辰七月戊戌朝奉郎江南東路提點刑獄司幹
辦公事戴君翊羽卒卜葬吉州廬陵縣儒林鄉長徑之
原既闕矣其父通直屬鄉先生葛漵叙行實來請銘予
固心許之無幾何通直君悲傷感疾丁巳八月乙酉遂
卒其孫師聖以十二月甲申奉父祖之柩葬焉北域相
去纔數十步予既熟君父子又憐師聖重有憂乃相誌

而繫以銘是亦掛劍之義也通直諱經字元禮世家廬
陵曾祖昶祖汝明父蔣行以貲聞君生七年而孤常產
為豪右漁奪租調闕

偏側艱難僅能立身去之傍縣

授徒營生而擇師友教其子淳熙二年一上登第自是
就養官舍享其報紹熙壬子郊恩封承事郎闕

甲寅

慶典遷議郎今上龍飛及宗祀明堂轉宣教通直郎性
喜周急與物無忤撫育弟之三女使皆有歸鄉人推為
長者妻同郡劉氏恩封宜人二男長朝奉君也季延熙

尚幼一女適進士陳九疇享年七十有二翊羽字漢宗一字漢卿童時知力學日記千言長通載籍益自刻苦遂以起家初補迪功郎潭州衡山尉盜不敢作帥辛棄疾才之檄行縣事臺府交薦陞從政郎以贛州零都丞守籍其能留真幕職贛故無夏稅酒課官府百須取辦科罰會孝宗手詔漕臣通融州縣財賦守委君求濟於漕臺至則數被詰責君力爭固請歲減三萬六千緡郡計以寬大盜姜姓者往來汀梅間犬牙贛境君攝倅督捕

知鄉丁徒擾於戰無益散遣數千人省費萬計賊亦不入境秩滿調道州江華令久闕正員帑廩赤立君單車就職視民如子不施鞭扑賦入以時上下交裕疊遇泛

恩循闕

郎成資諸曹改奉議郎知江州彭澤縣瀕江

數百家人困科歛君約已足用大率如江華時閭遇水旱力舉荒政無流移者轉承議郎覃恩遂遷員外郎賜七品服代還以親老外闕憲屬卒於鄱陽年四十有八妻安人胡氏一子將仕郎師聖也三女長適衡陽尹

天澤前卒餘未行君博聞強記著述自出機杼性儉約
所至或兼它官辭其添給兩為邑餐錢及迎送用例者
一無所有吏事精勤不苟使當要劇必有可觀誰謂其
止此銘曰

教子成名祿養俱榮云何不淑繼隕厥生華屋山丘存
亡相親鑽石為辭以昭後人

龍洲居士嚴君致堯墓碣慶元三年

嚴君致堯字正之吉州太和縣人曾祖闕生執衡執衡

生章贈右教郎是生四子其仲康元仕至朝奉郎通判
潮州次即君也君幼學敏茂長精辭藝一試舉場不中
慨然有四方之志輕財重義偉如也紹興三年羣盜充斥
虔吉閒多至三百餘火江西安撫大使李回以聞時岳
武穆公飛為神武副軍都統制授鉞專征道出廬陵士
卒托宿廬市黎明為主人汎掃門宇洗滌釜盎而去太
守供張郊餞師行將絕謁未及通問殿後者大將軍何
在笑曰已雜偏裨去矣其嚴肅如此所遇獨搜訪奇士誨

計策至太和君叩轅門一見語合許以從行初龍泉賊
帥彭友李動天等十人尤強暴號十大王盤闕四年攻
破八縣至是次第就縛兩郡以寧奏凱而還其後定鼎
澧安襄漢取唐鄧復郢隨全合肥君皆在焉屢委以事
積代版授七階方向宛洛擣趙魏而金人求成武穆公
罷兵柄獲罪矣君恨無以白杜郵之寃歸而放浪山水
間聚書教子自號龍洲居士有文集三十卷年五十六
以三十二年六月晦卒矣前娶章氏朝散大夫唐民之

女生三女適曾彌後李補曾瑜再娶郭氏蓋忠簡胡公叔母前夫之女忠簡擇君歸之生一男可久力學有聞不幸早世煥章閣待制誠齋楊公為誌其墓五女曾異倪巖老胡秘其壻也餘不及行孫男龜齡女適劉禹選君以隆興元年十二月辛未葬縣南橫弦山慶元三年十二月庚寅改卜高行鄉山塘之原而葬郭氏於羅墓距塋二里許先是誠齋狀君遺事甚備秘也實忘簡從孫以文采貢於鄉與予契厚而交深復來請銘固辭不

可銘曰

大丈夫不能擢犀角拔象齒游乎翰墨之林則當橫三尺出六奇以收邊塞之勲孰如君者兩有志而一無成此予所以聞風大息而追繫以銘也

朝議大夫賜紫金魚袋王君鎮墓碣

慶元四年

君諱鎮字靖之姓王氏其先陳留人曾祖潤贈中奉大夫祖履元豐八年登第徙居開封吹臺下元符中為學官上書論中宮廢立謫蘆州石康令仕至朝議大夫知

筠州父蕃事徽宗歷戶部侍郎欽宗方召用而京城陷
終延康殿學士朝議大夫累贈少師前母衛國夫人李
氏慶國夫人林氏嫡母福國夫人趙氏所生母宜人山
氏君幼以門蔭補將仕郎再奏承務郎建炎四年少師
避地永州卒於祁陽君方志學奉母挈弟妹葬少師桂
林弱冠躬耕南嶽下晝夜誦經史胡文定公安國忘年
接之紹興十五年調鄂州蒲圻丞攝行縣事為政有方
民不忍其去十八年知安豐軍六安縣窮邊凋瘵君御

之如家人出惟匹馬一騶即有拜授皆拒絕之江南猾
民冒佃荒田輒數千畝君躬按戶籍丁給百畝於是流
逋四歸願耕者衆二十三年知吉州吉水縣地廣事繁
君平心遣爭訟不問強弱貧富惟直是從善良既伸奸
惡亦化二十五年丁母憂服闋連籤書貴州鬱林州判
官廳公事凌鈇起雷風間甫定而王宣陳元復作亂君
適行郡事料集土丁激以忠義賊望風畏避容州以金
帛餉賊藤守霄遁官軍屢北主將皆戰死摧鋒軍統班

李宏亦被擒惟鬱林晏然終更士民遮道攀留去後歷
十年之久人頌其清德不哀乾道三年復籤書常德軍
節度判官廳公事七年知贛州安遠縣水土惡弱仕者
非死即病紀綱蕩然稅苗萬五千斛兵火後僅及其半
上司督取如故例均諸鄉君力乞侍閣竟從之夏稅折
闕所在上三等戶科麥而價重四五等科油麻枋木而
價輕安遠獨反是君始正之下戶皆受賜豪民佃山林
三百谷君毀其帖聽民樵採郭南省引溪水溉四百頃

有蕭文炳者廢陂而擅其利君部夫築之三日而成歲
以豐稔贛州多盜諸邑團民兵置隊首隊長徒擾無益
君命五家為小保而置一柝五小保為大保而置一鼓
各有長焉十六保則隸都保正許置兵器遇盜則擊柝
鳴鼓出兵器每發輒得淳熙二年調通判邵州始居於
衡改葬少師南岳下五年至邵太守忌其正譖君侵權
帥信讒移潭州衆論不平帥悔無及與諸司檄君權知
桂林林陽軍八年還朝初羅鬼國在真宗時嘗由廣西

入闕其後大理羅殿自杞諸而馬邕州隔絕不通閩商
吳汝翼誘其人假市道蠻洞以馬叩沅州求互市守呂
愛呂勝已縱吏希功皆坐生事免新將張端有亦非其
人方調守而譚帥呂椿薦君靜重可用堂選知州事諸
司以羅鬼馬既不售闕

檄闕積木為柵以杜其

來君謂通塗固難盡塞縱塞何人可守朝廷亦以蠻徭
種落百數不相統攝安能越境而至格不行舊募上丁
二百充郊用率多游手君精擇土著伉健者教以武藝

人人可用罷吏散監諸蠻怒其賞賚不時誣以剽奪帥
司追治甚急蠻皆走險君至則直之前都吏包遂者交
結監司補鄉丁統轄人畏之如虎有某氏女將嫁賂媒
姬給取之君窮治黥配額南併其徒論如法州之西曰
便溪又西曰崖門又西曰若溪前守開邊邀賞誘其長
殺之負固蓄憾遣兵討伐輒敗君歛兵開示大信于是
蠻主楊再彤兄弟親族相率來謝沿邊守臣專帶溪洞
都巡檢使提刑遺法命通判預其事即其廳自置一司

欲因事誅蠻酋吳自由三子君固爭不從自由聚兵謀入寇君言於朝明其無他三子皆得釋通判尋獲罪微君一方咸被其害君闕將代請祠主管建寧府武夷山冲佑觀既歸衡陽郡守劉清之以君才行聞上因記君名且曰清之所薦必不苟除提舉荆湖北路常平茶鹽公事諫官素惡清之指薦士為妄作命遂寢其後主管華州雲臺台州崇道觀紹熙四年六月十九日卒享年七十有八十二月十五日葬少師墓傍其地在岫巒峰

之東君仕官踰四紀再為邑三佐郡幕端良清介恬於
進取人悼其屈晚試郡稍見所長則已老矣平生無嗜
好不治產業惟喜讀書於詩易皆有論著嘗謂管子八
十一篇真偽相雜定為內書藏於家有集西漢文錄二
十卷著述七百餘篇號覆瓿編積官朝散大夫賜服金
紫娶陳氏封宜人四男長曰淮今知闕州零縣次涖道
州永寧縣主簿次準舉進士李沔前死四女長曰濟適
向文簡公七世孫公瑩次漳不肯嫁次汶適邢鉉死再

歸胡文定公孫荆湖北路安撫司準備差遣太常次章
遼永州錄參謝壽孫死再歸衡州來陽縣令曾之謹孫
男三人楮檜檣女三人植栓榕淮以廸功郎監潭州南
岳廟劉德老所作行狀走數百里泣拜請銘予知君舊
矣德老又賢可信乃為銘曰

為官擇人世獨不然求則得之弗求捨旃有美王君素
安銓調輶傳方乘煩言已噪有功未知抱能未施心何
怨尤人自嗟咨我宣幽光辭則無愧慰其子孫亦勸吉

士

贛州洪史君

櫬

墓碣

慶元五年

高宗皇帝即位之三年歲在己酉國步多艱獫狁孔熾
擇使修好無敢應選惟洪忠宣公以小官毅然行拘繫
朔庭十有五年艱險甚於蘇武誠竭力殫和好迄成白
首來歸壽母在堂三子繼登博學宏辭科名予曰此盛
德之報也當出疆時冢子文章名闕中外乾道中相孝
宗號名臣而史君又其冢子聞見之廣不扶自直忠宣

薨以長孫特充本路漕屬助襄事會予分教金陵日與之將年雖弱冠而練達明敏不啻老成人家方鼎盛而謹飭謙和畧無子弟之過予敬而愛之越四十年予退老於家君以二千石高第擢守章貢兼江西路兵馬鈐轄日期千騎開塗一笑道舊故旋聞其道卒遺恨至今諸子遠以表墓請予其何可辭史君初名格字成之後改名槻字規之世家饒州鄱陽縣曾大父右通直郎贈太師秦國公諱彥先祖忠宣公諱皓仕至徽猷閣直學

士左朝散大夫贈太師魏國公父文惠公諱适終觀文殿
學士正議大夫贈太師魏國公妣魏國夫人沈氏君初以
忠宣使金補將仕郎紹興二十六年起家迪功郎江南
東路轉運司準備差遣隆興初充湖廣等路總領財賦
所幹辦公事分司九江完顏亮敗盟皇甫倜一軍嗷嗷
待哺樞密使王公災時總餉事以軍儲未集為憂君請
求濟於朝用足而民不知文惠入相丐監南岳廟君師
列曠黃金君固却之乾道元年循右從政郎三年用舉

主改宣教郎七年知闕州德安縣歲儉君曰附郭近而易見鄉村遠而難周親行阡陌勸上户平價出粟又擇中户以上衆所服者分任其事民無流殍居三載邑大治淳熙四年賜服緋銀六年通判德安府俄丁內艱九年通判興州吳挺以都統制兼州事委政于君金州被邊洵陽上律大饑置制漕三司各出三千緡命君賑濟提刑勾躍易亦來一見君盡以付之君製衣履履涉山險徧抵兩邑又請益米萬斛于制置使軍民帖然將疇

庸而文惠公薨君六歲兩經父母喪春秋寔宥之事哀
戚勞苦人不能堪鄉黨稱其孝服除調通判洋州嘗行
郡事辭俸給用例西鄉舊有堰介山間每春水暴至湍
險決潰籤判樊煒刷三邑義士數千人修築已興工君
言徒費無益申諸司罷之擢守西和州陞對論綱馬多
道斃宜飼養興元一月然後發升差軍官當先戰功後
資歷以徠奇士孝宗然之姻家楊侍郎王休除利路轉
運判官引嫌改知和州紹熙三年也邊壘斗大儉以足

用寬以愛民革弊端嚴政體徙西川提刑又當易地求
主管華州雲臺觀以歸慶元二年起知滁州州本留闕
待朝士京丞相鏜在蜀知君治行奏特闕之君請邊郡

守倅勿闕年七十人詔可至則因歲豐補前改免借椿

積米萬計葺倉廩置貢院皆兵興以來未暇及者待僚

屬雖寬後有小使臣遭喪規免特服部為符州君曰沿

邊職任謂主兵者監軍輩何預徒害風教奏令解官後

遂立闕兩考用新闕再留一年諸司交薦朝廷擇大

藩處君不幸暑行瘧泄以五年七月十三日終於池州
東流縣享年六十三積官自通直郎轉至朝闕大夫娶
黃氏劉氏周氏俱封宜人四男儼終承事郎今知常德
府龍陽縣丞次輔承事郎提領建康府戶部贍軍酒庫
所幹辦公事傳將仕郎仇未仕女二人長適修職郎前
無為軍巢縣主簿權當國次許嫁進士黃浚皆劉出也
孫二人曰芾曰蘊女一諸孤以是年十一月壬辰奉柩
合葬劉宜人之兆地在本縣義仁鄉大觀山君由少至

老奉養儉素殆過寒士自文惠公樂施周急雖大用無
餘貲君綽有父風田園不能卒歲惟市書籍教子以清
白傳家可謂賢也已銘曰

醇而正明而靜如玉如瑩吉人之陞兮簡而敬定而應
為守為令循吏之政兮忠宣之忠文惠之文嫡長相承
先世之盛兮山川孔良時日允臧有永其藏後人之慶
兮

文忠集卷七十七